



## **BSN bantu rakyat jadi celik kewangan**

November 2, 2022 @ 3:24pm

KUALA LUMPUR: Bank Simpanan Nasional (BSN) mengadakan beberapa aktiviti berkaitan literasi dan rangkuman kewangan sepanjang Oktober, bersempena dengan Bulan Literasi Kewangan (FLM) 2022 anjuran Bank Negara Malaysia (BNM).

BSN merangka program literasi kewangan yang menyeluruh merangkumi golongan B40, komuniti di pedalaman Sabah dan Sarawak serta pelajar membabitkan lebih 10,000 murid di 26 sekolah seluruh Malaysia.

Sementara itu, 'Bengkel Literasi Kewangan bersama B40: Ringgit Dijaga, Kewangan Sejahtera' diadakan bersama penduduk di Program Perumahan Rakyat (PPR) Seri Semarak, Setapak, Kuala Lumpur.

Bengkel dijalankan dengan kerjasama Agensi Kaunseling dan Pengurusan Kewangan (AKPK) bertujuan untuk menyediakan ruang dan peluang bagi komuniti mendapatkan pengetahuan asas mengenai perancangan kewangan, aliran tunai dan simpanan.

Penduduk turut didedahkan dengan teori pengetahuan dan pemahaman serta simulasi untuk menguruskan kewangan, sekali gus meningkatkan simpanan mereka.

Ketua Eksekutif BSN, Jay Khairil, berkata pengurusan kewangan yang baik adalah perkara yang penting dalam pembangunan masyarakat.

"Atas dasar itu, BSN menyahut usaha yang dilaksanakan oleh Jaringan Pendidikan Kewangan (FEN) dengan turut memperkasakan program berkaitan literasi kewangan dalam kalangan rakyat Malaysia bagi mendidik mereka membuat keputusan kewangan dengan lebih baik, sekali gus dapat meningkat simpanan," katanya.

Aktiviti literasi kewangan BSN turut dijalankan bersama masyarakat pedalaman melalui 'Taklimat Literasi di Cawangan Bank Bergerak' (CBB) di Sabah dan Sarawak.

Empat lokasi taklimat yang telah dijalankan adalah di Keningau dan Tawau, Sabah serta Pakan dan Kabong, Sarawak.

Melalui taklimat ini, masyarakat didedahkan dengan pendidikan kewangan serta perbankan digital terutamanya elemen keselamatan dan jenayah kewangan. Turut diadakan adalah aktiviti kuiz, cabutan bertuah, pertandingan mewarna dan pertandingan 'Jom Menabung'.

CBB adalah platform perbankan yang disediakan oleh BSN bagi membantu masyarakat di kawasan pedalaman terutamanya Sabah dan Sarawak mendapatkan akses perbankan seperti transaksi pengeluaran wang tunai melalui Mesin Teler Automatik (ATM), pembukaan akaun dengan Kad Debit BSN VISA, simpanan tunai, pembayaran bil-bil utiliti, simpanan di BSN Sijil Simpanan Premium (BSN SSP) dan tambah nilai prabayar.